

**БЕШИНЧИ БЎЛИМ**

ЎЗБЕКИСТОН РЕСПУБЛИКАСИ МОЛИЯ ВАЗИРЛИГИ  
ЎЗБЕКИСТОН РЕСПУБЛИКАСИ ХАЛҚ ТАЪЛИМИ ВАЗИРЛИГИНИНГ  
ҚАРОРИ

**400 «Баркамол авлод» болалар марказларида болалар ўқиганлиги учун ота-оналар тўловини ундириш ва ундан фойдаланиш тартиби тўғрисидаги низомни тасдиқлаш ҳақида**

*Ўзбекистон Республикаси Адлия вазирлиги томонидан 2011 йил 23 сентябрда рўйхатдан ўтказилди, рўйхат рақами 2267*

*(2011 йил 3 октябрдан кучга киради)*

Ўзбекистон Республикаси Вазирлар Маҳкамасининг 2011 йил 28 февралдаги 50-сон «Мақтадан ташқари таълим тизимини янада такомиллаштириш чора-тадбирлари тўғрисида»ги (Ўзбекистон Республикаси қонун ҳужжатлари тўплами, 2011 йил, 9-сон, 89-модда) қарорига мувофиқ Ўзбекистон Республикаси Молия вазирлиги ва Халқ таълими вазирлиги **қарор қилади:**

1. «Баркамол авлод» болалар марказларида болалар ўқиганлиги учун ота-оналар тўловини ундириш ва ундан фойдаланиш тартиби тўғрисидаги низом иловага мувофиқ тасдиқлансин.

2. Мазкур қарор Ўзбекистон Республикаси Адлия вазирлигида давлат рўйхатидан ўтказилган кундан бошлаб ўн кун ўтгандан кейин кучга киради.

**Молия вазири**

**Р. АЗИМОВ**

Тошкент ш.,  
2011 йил 10 август,  
48-сон

**Халқ таълими вазири**

**Т. ШИРИНОВ**

Тошкент ш.,  
2011 йил 10 август,  
23-сон

Ўзбекистон Республикаси  
Молия вазирлиги ва Халқ таълими  
вазирлигининг 2011 йил 10 августдаги  
48, 23-сон қарорига  
ИЛОВА

**«Баркамол авлод» болалар марказларида болалар  
ўқиганлиги учун ота-оналар тўловини ундириш ва  
ундан фойдаланиш тартиби тўғрисида  
НИЗОМ**

Ушбу Низом Ўзбекистон Республикаси Вазирлар Маҳкамасининг 2011 йил 28 февралдаги 50-сон «Мақтабдан ташқари таълим тизимини янада такомиллаштириш чора-тадбирлари тўғрисида»ги (Ўзбекистон Республикаси қонун ҳужжатлари тўплами, 2011 йил, 9-сон, 89-модда) қарорига мувофиқ «Баркамол авлод» болалар марказларида ўқиганлиги учун ота-оналар тўловини (кейинги ўринларда — тўлов) ундириш ва ундан фойдаланиш тартибини белгилайди.

**I. Умумий қоидалар**

1. Тўлов вилоят марказлари, Нукус ва Тошкент шаҳарларида ойига энг кам ойлик иш ҳақининг 10 фоизи миқдорида ва республиканинг бошқа туманлари (шаҳарлари)да 5 фоиз миқдорида ундирилади.

**II. Тўловни амалга ошириш**

2. Тўлов ота-она (уларнинг ўрнини босувчи шахслар) ва «Баркамол авлод» болалар маркази ўртасида тузилган шартномага асосан тўланади. Ушбу шартномада тўлов белгиланган миқдорда ва узрли сабабларсиз тўланмаган тақдирда боланинг таълим олишини тўхтатиш ва бекор қилиш шартлари кўрсатилиши шарт.

3. Ҳар ойда жорий ой учун тўлов мазкур ойнинг 10-санасидан кечикмасдан тўланади.

4. Мазкур Низомнинг 3-бандида кўрсатилган муддатдан сўнг тўлов икки ҳафта мобайнида белгиланган миқдорда ва узрли сабабларсиз тўланмаган тақдирда, боланинг ўқиши тўхтатилади, агар тўлов бўйича қарздорлик ушбу қарздорлик юзага келган кундан бошлаб 30 календарь кун мобайнида тўланган бўлса, боланинг ўқиши қайта тикланади.

5. Тўлов бўйича қарздорлик у юзага келган кундан бошлаб 30 календарь кун мобайнида қопланмаса, бола белгиланган тартибда «Баркамол авлод» болалар марказида таълим олувчилар сафидан чиқарилади. Бу ҳолда боланинг «Баркамол авлод» болалар марказида ўқишини қайта тиклаш янги қабул қилинадиган болалар учун белгиланган тартибда амалга оширилади.

6. Тўлов банк муассасаларига тўланади. Бунда тўловни тасдиқлайди-

ган ҳужжат (квитанция) нусхаси «Баркамол авлод» болалар марказига тақдим этилади.

Тўлов нақд пулсиз шаклда амалга оширилган ҳолда (пластик карточкалардан тўлашдан ташқари) «Баркамол авлод» болалар марказига тўлов топшириқномасининг нусхаси (тўлов тўланганлик тўғрисидаги банк белгиси қўйилган ҳолда) тақдим этилади.

7. Тўлов «Баркамол авлод» болалар марказига хизмат кўрсатувчи тегишли Ғазначилик бўлимининг ҳудудий ғазначилик ҳисоб рақамларига ўтказилади ва тегишли «Баркамол авлод» болалар марказининг шахсий ғазначилик ҳисоб рақамида ундан кейинчалик фойдаланиш учун ҳисобга олинади.

8. Боланинг «Баркамол авлод» болалар марказига қатнаши бекор қилинганда жорий ой тўлови ота-она (уларнинг ўрнини босувчи шахслар)нинг бола «Баркамол авлод» болалар марказига қатнаши бекор қилингунига қадар камида уч кун олдин берган ёзма аризасига асосан тўлиқ бўлмаган ой учун (яъни қатнаши бекор қилинган кунга қадар) тўланиши мумкин. Бундай ариза мавжуд бўлмаганида тўлов тўлиқ ой учун тўланиши шарт.

Бунда, боланинг «Баркамол авлод» болалар марказига қатнашига ушбу ой учун тўловнинг қолган қисми тўланмагунича рухсат берилмайди.

### III. Тўлов ҳисоб-китоби

9. Бир кунлик тўлов миқдорини аниқлаш учун ойлик тўлов миқдори «Баркамол авлод» болалар марказининг бола жорий ойда қатнайдиغان тўғараги иш кунларининг режадаги сонига бўлинади.

Бунда, бола «Баркамол авлод» болалар марказидаги биттадан ортиқ тўғарақда ўқийдиган бўлса, тўлов ҳар бир тўғарақда ўқиганлик учун белгиланган миқдорда алоҳида ундирилади.

10. Боланинг «Баркамол авлод» болалар марказига ўзи ёки оила аъзоларининг касаллиги (карантин) оқибатида, шунингдек ота-она (уларнинг ўрнини босувчи шахслар)нинг меҳнат таътили пайтида уч кундан ортиқ кетма-кет келмаганлиги даври учун тўлов кейинги ойлар учун тўлов ҳисобига ҳисобланади. Бунда, «Баркамол авлод» болалар марказининг тегишли иш кунлари сони ҳисобга олинади.

Боланинг «Баркамол авлод» болалар марказига ўзининг ёки оила аъзоларининг касаллиги (карантин) оқибатида узрли сабабга кўра келмаслиги тегишли даволаш муассасаси томонидан берилган маълумотнома билан тасдиқланиши шарт.

11. Болаларнинг «Баркамол авлод» болалар марказига келмаган бошқа барча ҳолларида тўлов умумий асосларда ундирилади.

### IV. Тўловдан озод қилиш

12. «Баркамол авлод» болалар марказларида таълим олувчиларнинг тегишли контингенти умумий сонининг 15 фоизи доирасида кам таъминланган оила болалари тўловдан озод қилинади.

Бунда, биринчи навбатда ота-онаси (биттаси ёки иккаласи) I ёки II гуруҳ ногирони бўлган кам таъминланган оила болалари, шунингдек ҳар бир оила аъзоси учун ҳисоблаганда ўртача ойлик даромади энг паст даражада бўлган кам таъминланган оила болалари тўловдан озод қилинади.

13. Фуқароларнинг ўзини ўзи бошқариш органи томонидан оиланинг кам таъминланганлиги тўғрисида «Баркамол авлод» болалар марказига тақдим этилган маълумотнома болани тўловдан озод қилиш учун асос бўлади.

14. Тўловдан озод қилинадиган кам таъминланган оила фарзандлари рўйхати (кейинги ўринларда Рўйхат деб юритилади) молиявий йил бошлангунига қадар «Баркамол авлод» болалар маркази раҳбарининг буйруғи билан тасдиқланади.

15. Болалар «Баркамол авлод» болалар марказида таълим олувчилар сафидан чиқарилиши оқибатида Рўйхат ўзгарган тақдирда илгари Рўйхатга кирмаган кам таъминланган оила болаларидан шакллантириладиган захира ҳисобига тўлдирилади. Рўйхатни тўлдиришда ушбу Низомнинг 12-бандининг иккинчи хатбошисида кўрсатилган биринчи навбатлилиқ талабларига риоя қилинади.

16. Болалар «Меҳрибонлик» уйлари, болалар шаҳарчалари, «SOS — Ўзбекистон болалар маҳаллалари» уюшмаси тарбия муассасалари тарбияланувчилари (кейинги ўринларда тарбияланувчилар деб юритилади) «Баркамол авлод» болалар марказларида тўловдан озод қилинади.

Тўловдан озод қилинган тарбияланувчилар рўйхати «Меҳрибонлик» уйлари, болалар шаҳарчалари, «SOS — Ўзбекистон болалар маҳаллалари» уюшмаси тарбия муассасалари, халқ таълими муассасалари фаолиятини методик таъминлаш ва ташкил этиш туман (шаҳар) бўлимлари ҳамда тегишли туман (шаҳар) ҳокимликлари молия бўлими раҳбарлари билан келишилган ҳолда «Баркамол авлод» болалар маркази раҳбари томонидан тасдиқланади.

## **V. Тўловлардан тушадиган маблағлардан фойдаланиш**

17. Тўлов сифатида тушган маблағлар «Баркамол авлод» болалар марказларига тўгарак ишлари учун зарур материаллар ва хом ашё сотиб олишга мақсадли йўналтирилади.

## **VI. Бухгалтерлик ҳисоби ва ҳисоботи**

18. Бухгалтерлик ҳисобини юритиш, шунингдек тўловлардан тушадиган маблағларнинг кирим қилиниши ва сарфланиши ҳисоботларини тузиш қонун ҳужжатларида белгиланган тартибда амалга оширилади.

## **VII. Яқуний қоидалар**

19. Тўловларнинг ўз вақтида тушиши ва тўғри ҳисобланиши, ҳисоб ва ҳисобот юритилиши, шунингдек тушган маблағлардан мақсадли фойдаланилиши устидан назорат Ўзбекистон Республикаси Молия вазирлиги Назорат-

тафтиш бош бошқармаси ва унинг жойлардаги ҳудудий бошқармалари томонидан амалга оширилади.

20. Ушбу Низом талабларининг бузилишида айбдор бўлган шахслар қонун ҳужжатларида белгиланган тартибда жавобгар бўладилар.

21. Ушбу Низом «SOS — Ўзбекистон болалар маҳаллалари» уюшмаси билан келишилган.

*«SOS — Ўзбекистон болалар  
маҳаллалари» уюшмаси  
директори в. б.*

**М. УМУРЗОҚОВА**

*2011 йил 10 август*